

आकाशवाणी जयपुर—अजमेर

प्रादेशिक समाचार

दिनांक 24.11.2024 समय: 18.45 बजे

- प्रधानमंत्री नरेंद्र मोदी गैर राजनीतिक पृष्ठभूमि रा युवावां सूं राजनीति मांय भेळा होणे री अरज करी—कयो—एक लाख युवावां ने राजनीति सूं जोडणे खातिर विशेष अभियान चलाया जावेला।
- प्रधानमंत्री नरेंद्र मोदी काले नुवी दिल्ली मांय अंतर्राष्ट्रीय सहकारी गठबंधन रे वैश्विक सहकारी सम्मेलन रो उद्घाटन करेला।
- संसद रो शीतकालीन सत्र काले सूं—सर्वदलीय बैठक मांय संसदीय कार्य मंत्री विपक्षी दळां सूं सत्र रे सुचारू संचालन मांय सहयोग री अरज करी।
- प्रदेश मांय दिन अर रात रे तापमान मांय उतार—चढाव रे बीचे हळकी ठण्ड रो असर जारी।

000

प्रधानमंत्री नरेन्द्र मोदी गैर—राजनीतिक पृष्ठभूमि आळा पिरवारां रा युवावां सूं राजनीति मांय भेळो होणे री अरज करी है। आकाशवाणी सूं मन की बात कार्यक्रम मांय आज श्री मोदी कयो कि ऐडा एक लाख युवावां ने राजनीति सूं जोडणे खातिर देश मांय केई खास अभियान चलाया जावेला।

.....

प्रधानमंत्री निस्वार्थ भाव सूं समाज खातिर काम करण वाळां युवावां रे बारे मांय बात करी। वणा डिजिटल जीवन प्रमाण पत्र रे मामळे मांय वृद्धजनां री सहायता करण वाळा लखनऊ रा वीरेंद्र री प्रशंसा करी। श्री मोदी कयो कि ओ डिजिटल जीवन प्रमाण पत्र बुजुर्गां खातिर बड़ी सुविधा प्रदान करी है। वणा कयो के ऐडा प्रयासां सूं डिजिटल जीवन प्रमाण पत्र पावण वाळां री संख्या 80 लाख सूं बत्ती व्हे ग्यी है। श्री मोदी बतायो कि अहमदाबाद रा राजीव लोगां ने डिजिटल अरेस्ट रे खतरे रे बारे मांय आगाह कर रिया है। प्रधानमंत्री दोहरायो कि सरकार मांय डिजिटल अरेस्ट रो कोई प्रावधान नी है।

.....

आज राष्ट्रीय कैंडेट कोर दिवस माथे श्री मोदी कैंडेट रे रूप मांय बिताया दिनां ने याद कर्यो। श्री मोदी कयो कि एनसीसी युवावां मांय अनुशासन, नेतृत्व अर सेवा री भावना पैदा करे है।

प्रधानमंत्री युवावां सूं बत्ती ऊं बत्ती संख्या मांय एनसीसी सूं जुडणे री अरज करी। श्री मोदी कयो कि जैव—विविधता ने बणाये राखणे मांय गौरैया री खास भूमिका है। पण बढता शहरीकरण रे कारणे शहरां मांय गौरैया रे अस्तित्व माथे खतरे परां चिंता जताई है।

प्रधानमंत्री नरेंद्र मोदी कयो है कि एक पेड़ मां के नाम अभियान केवल पांच महीना मांय मांय 100 करोड़ पेड़ लगाणे री खास उपलब्धि हासिल कर ली है। श्री मोदी देशभर रे लोगां ने इण अभियान मांय भाग लेणे माथे खुशी जताई है।

श्री मोदी स्वच्छता रे बारे मांय कयो कि सरकारी कार्यालयां सूं दशकां पुराणी फाइलां अर कबाड़ हटाणे खातिर विशेष स्वच्छता अभियान चलायो गयो। वणा कयो कि इण अभियान मांय सरकारी महकमा मांय आश्चर्यजनक नतीजा मिल्या है अर घणी जगह भी खाली व्ही है।

.....

प्रदेश मांय भी मन की बात कार्यक्रम ने लेर खासो उच्छास निजर आयो। राजधानी जयपुर, पाली साथे राज्य री न्यारी न्यारी जगावां माथे भाजपा कार्यकर्तावां अर आमजन मन की बात कार्यक्रम ने सुण्यो।

000

प्रधानमंत्री नरेंद्र मोदी काले नई दिल्ली मांय अंतर्राष्ट्रीय सहकारी गठबंधन रे वैश्विक सहकारी सम्मेलन रो उद्घाटन करेला। श्री मोदी अंतर्राष्ट्रीय सहकारिता बरस 2025 माथे एक स्मारक डाक टिकट भी जारी करेला। इण कार्यक्रम मांय लगेटगे तीन हजार विदेशी अर भारतीय प्रतिनिधियां रे भेळे होने री आस है। छह दिन चालण वाळा इण सम्मेलन मांय दुनियाभर री सहकारी समितियां केई कार्यक्रमां अर चर्चावां मांय भेळी व्हेला। सम्मेलन रो विषय सहकारिता से सभी की समृद्धि का निर्माण है। सम्मेलन मांय सगळा खातिर सामूहिक, शांतिपूर्ण अर समृद्ध भविष्य रे निर्माण मांय सहकारी समितियां री भूमिका माथे चर्चा करी जावेला। इण मांय भूटान रा प्रधानमंत्री दाशो छेरिंग तोबगे अर फिजी रा उप प्रधानमंत्री मनोआ कामिकामिका भी भेळा व्हेला।

.....

संसदीय कार्य मंत्री किरें रिजिजू कयो है कि सरकार काले सूं सरू हो रिया संसद रा शीतकालीन सत्र मांय सगळा मुद्दां माथे चर्चा खातिर तैयार है। नुवी दिल्ली मांय सर्वदलीय बैठक रे पाछे श्री रिजिजू विपक्षी दळां सूं सत्र रे सुचारू संचालन मांय सहयोग करणे री अरज करी। बैठक री अध्यक्षता रक्षा मंत्री राजनाथ सिंह करी।

इण मांय केंद्रीय मंत्री अनुप्रिया पटेल, एल मुरुगन, समाजवादी पार्टी रा राम गोपाल यादव, एमडीएम रा सांसद वाइको, कांग्रेस रा प्रमोद तिवारी, जयराम रमेश अर दूजा सांसद भेळा व्ह्या। शीतकालीन सत्र काले सूं शुरू व्हेला अर 20 दिसंबर ताई चालेला। संविधान दिवस रे मौके माथे 26 नवंबर ने संसद री बैठक नी व्हेला।

000

संसद रा काले सूं सरू होवण वाळा शीतकालीन सत्र सूं पैल्या लोकसभा अध्यक्ष ओम बिरला सदस्यां सूं संसद री मर्यादा बणाये राखणे री अरज करी। आकाशवाणी समाचार ने दिया गया एक खास साक्षात्कार मांय श्री बिरला आस जताई है कि सांसद सकारात्मक अर रचनात्मक बहस री परंपरा मांय योगदान देवेला। वणां सांसदां सूं सदन मांय मर्यादा रे उच्चतम मानक थापित करणे री अपील करी। मंगलवार ने मनाया जावण वाळा संविधान दिवस सूं पैल्या श्री बिरला संविधान माथे खतरे रे सगळा दावां ने खारिज कर्यो। वणा कयो कि संविधान देश रे लोगां रो है अर समाज रा सगळा तबकां रो इण मांय भरोसो है। श्री बिरला कयो कि संविधान ने सियासी नजरिये सूं नहीं देख्यो जाणो चाहिजे।

000

सिखां रा नौवां गुरु, श्री गुरु तेग बहादुर रो आज शहीदी दिवस मनायो जा रियो है। 1675 मांय आज ही रे दिन श्री गुरु तेग बहादुर जी धर्म, मानवीय मूल्यां, आदर्शां अर सिद्धांतां री रक्षा खातिर आपरा प्राण बलिदान दियो हो। वांणे बलिदान ने हर बरस शहीदी दिवस रे रूप मांय याद करयो जावे है। राष्ट्रपति द्रौपदी मुर्मू अर उपराष्ट्रपति जगदीप धनखड़ गुरु तेग बहादुर ने वां रे शहीदी दिवस माथे सिरधांजलि दी है।

000

युवा कार्यक्रम अर खेल मंत्रालय री कानी सूं माय भारत पोर्टल रे माध्यम सूं विकसित भारत यंग लीडर्स डायलॉग कार्यक्रम रो आयोजन 25 नवंबर सूं माय भारत पोर्टल माथे राख्यो जावेला। देशभर सूं चुण्या गया 3000 युवावां ने राष्ट्रीय युवा दिवस रे मौके माथे प्रधानमंत्री नरेंद्र मोदी सूं रूबरू होणे रो मौको मिलेला। अजमेर रा जिला युवा अर खेल अधिकारी जयेश मीना बतायो कि विकसित भारत यंग लीडर्स डायलॉग कार्यक्रम पुनर्कल्पित युवा महोत्सव है, जिण मांय भारत रा भविष्य ने आकार देवण मांय युवावां री भागीदारी प्रेरित करणे री चार चरणां मांय होड़ व्हेला।

000

जयपुर रा मुहाना मांय काले फूड लाइसेंस अर रजिस्ट्रेशन शिविर राख्यो जावेला। मुख्य चिकित्सा अर स्वास्थ्य अधिकारी जयपुर द्वितीय डॉक्टर हंसराज भदालिया बतायो कि शिविर मांय खाद्य व्यापारियां रे फूड लाइसेंस अर रजिस्ट्रेशन मौके माथे ही बणाया जावेला। साथे ही व्यापारियां ने खाद्य सुरक्षा अर मानक अधिनियम रे प्रावधानां री जाणकारी दी जावेला। वणा बतायो कि शिविर मांय किराणा, मिठाई, होटल, डेयरी, रेस्टोरेंट, हलवाई, केटरिंग व्यापारियां, फास्ट फूड, चाट, पकौड़ी, फल, सब्जी रा ठेला, स्टॉल लगावण वाळा विक्रेतावां रा आवेदन ऑनलाइन लेर मौके माथे ही लाइसेंस अर रजिस्ट्रेशन जारी करया जावेला। शिविर मांय मोबाइल फूड टेस्टिंग लैब ऑन व्हील्स रे माध्यम सूं आमजन ने खाद्य पदार्थां री शुद्धता, गुणवत्ता अर मिलावट रा बारा मांय जागरूक कर्यो जावेला।

0000

प्रदेश मांय दिन अर रात रा तापमान मांय उतार-चढाव रे बीचे हळकी ठंड रो असर बण्योडो है। लारला चौबीस घंटा मांय राज्य रा एकमात्र पर्वतीय पर्यटन स्थल माउंट आबू मांय तापमान मांय मामूली बढ़ोतरी दरज करीजी है। वठी ने रात रो तापमान 6 दशमलव 4 डिग्री सेल्सियस दरज व्ह्यो। वठी ने राज्य रा घणखर ठोडां माथे दिन रो तापमान 26 डिग्री सेल्सियस सूं 31 दशमलव 5 डिग्री सेल्सियस रे बीच बण्योडो है। मौसम केन्द्र जयपुर रे मुजब आवता एक सप्ताह ताई राज्य री घणखर जगावां माथे मौसम सूखो रेहणे री आस है।

000

प्रदेश रा न्यारा-न्यारा जिलां मांय आज मतदाता सूचियां रो खास संक्षिप्त पुनरीक्षण कार्यक्रम राख्यो गयो। नीमकाथाना तहसील खेतर मांय तहसीलदार न्यारा न्यारा मतदान केन्द्रां रो जायजो करयो। पुनरीक्षण कार्यक्रम रे चालता 1 जनवरी 2025 ने 18 बरस री उमर पूरी करण वाळा मतदातावां रा नाम जोडणे अर

संशोधन खातिर अर्जियां ली गई। वठी ने हनुमानगढ अर पाली जिला मांय भी न्यारी न्यारी जगावां माथे पुनरीक्षण कार्यक्रम चलायो गयो।

00000

राष्ट्रीय उपभोक्ता हेल्पलाइन शिकायत समाधान मांय तेजी लावण खातिर आपरे कन्वर्जेंस कार्यक्रम रे तैत एक हजार सूं बत्ती कम्पनियां रे साथे भागीदारी करी है। ऐ कंपनियाँ ई-कॉमर्स, निजी शिक्षा, एफ एम सी जी, उपभोक्ता टिकाऊ वस्तुएँ, इलेक्ट्रॉनिक उत्पाद, खुदरा दुकानां, ऑटोमोबाइल अर बैंकिंग साथे केई खास खेतरां मांय फैल्योडी है।

उपभोक्ता मामलां रा मंत्रालय कयो कि ऐ कन्वर्जेंस कंपनियां सूं जुड़ी शिकायतां ने ऑनलाइन समाधान खातिर सीधे वांणे कने ट्रांसफर कर्यो जावेला। मंत्रालय कयो कि कन्वर्जेंस भागीदारां री संख्या 2017 मांय 263 कंपनियां सूं लगोतार बध र एक हजार नौ कंपनियां ताई पहुंच गयी है।

000

संविधान दिवस माथे 26 नवंबर ने राष्ट्रीय महिला आयोग अर नगर निगम बीकानेर रे तत्वावधान मांय खास कार्यक्रम रो आयोजन व्हेला। मेयर सुशीला कंवर राजपुरोहित बतायो कि रविन्द्र रंगमंच मांय "हम भारत की महिलाएं" अर संविधान निर्माण में महिलाओं के योगदान विषय माथे नाट्य कार्यक्रम अर सम्बोधन व्हेला। कार्यक्रम मांय राज्यपाल हरिभाऊ बागडे, केंद्रीय कानून मंत्री अर्जुनराम मेघवाल, राष्ट्रीय महिला आयोग री अध्यक्ष विजया राहटकर अर विधि मंत्री जोगाराम पटेल दूजा गणमान्य लोग मौजूद रेवेला।

000

55वों भारतीय अंतर्राष्ट्रीय फिल्म महोत्सव मांय क्रिएटिव माइंड्स ऑफ टुमॉरो रा नतीजा आज घोषित करया गया। टीम ग्रीन री फिल्म गुल्लू सर्वश्रेष्ठ फिल्म रो पुरस्कार जीत्यो। इण रे खातिर टीम ग्रीन ने 5 लाख रुपया रो नकद पुरस्कार दियो गयो। इणी फिल्म रा पुष्पेंद्र कुमार ने सर्वश्रेष्ठ अभिनेता रो पुरस्कार जित्यो। लवपिलक्स सब्सक्रिप्शन फिल्म खातिर विशाखा नाइक ने सर्वश्रेष्ठ अभिनेत्री रो पुरस्कार मिल्यो। बातचीत मांय पुष्पेंद्र क्रिएटिव माइंड्स ऑफ टुमॉरो ने एक अभूतपूर्व अनुभव बतायो। वणा युवा फिल्म निर्मातावां ने लघु फिल्मां ने बकत माथे पूरो करणे मांय सहयोग खातिर अंतर्राष्ट्रीय फिल्म महोत्सव रो आभार जतायो। होड़ खातिर चुण्या गया 100 युवा प्रतिभागियां रे एक समूह ने 20-20 सदस्यां री पांच टीमां मांय बांट्यो गयो हो। वां ने 48 घंटां रे मांय-मांय एक लघु फिल्म बणावण रो काम सौप्यो गयो हो। इण पहल रो खास लगस फिल्म बणाणे रे खेतर मांय युवा प्रतिभावां ने बधावो देणो है।

000